



ル 5
133
1



名
133
1

東京帝國
學校圖書

新 鞅 性 地
理 志 彙 釋
十 中 卷

所錄或
有從明

明治三十二年一月九日
致海島可題

十 中 卷
理 志 彙 釋
新 鞅 性 地

會稽章氏用咫
進齋臧本校刊

新輯注地里志目錄敘

敘錄卷第一

京兆尹左馮翊右扶風卷第二

宏農河東太原上黨卷第三

河內河南東郡陳留潁川卷第四

汝南南陽南郡卷第五

江夏廬江九江山陽濟陰沛郡卷第六

魏郡鉅鹿常山清河涿郡卷第七

勃海平原千乘濟南泰山齊郡卷第八

北海東萊琅邪東海臨淮卷第九

會稽丹陽豫章桂陽武陵零陵卷第十

漢中廣漢蜀郡犍爲越巂益州牂柯卷第十一

巴郡武都隴西金城天水武威張掖酒泉敦煌安定卷

第十二

北地上郡西河朔方五原雲中定襄雁門代郡上谷卷

第十三

漁陽右北平遼西遼東元菟樂浪南海鬱林蒼梧交趾

合浦九眞日南卷第十四

趙國廣平眞定中山信都河間廣陽菑川膠東高密城

陽淮陽梁國東平魯國卷第十五

楚國泗水廣陵六安長沙風俗卷第十六

敘曰秦始皇二十六年兼并六國分天下爲三十六郡

曰河東太原上黨三川東郡潁川南陽南郡九江長沙

泗水薛郡碭郡鉅鹿邯鄲齊郡琅邪會稽漢中蜀郡巴

郡隴西北地上郡九原雲中雁門代郡上谷漁陽右北

平遼西遼東南海桂林象郡以內史爲宰制首善之區

不爲郡後又略取閩中置閩中郡秦敗南海三郡爲趙

佗所得閩中爲亡諸所得故漢初郡國入版圖者雖仍

秦三十六郡之舊而邊竟或不及焉高帝二年分秦內

史置渭南中地河上三郡改項羽殷國爲河內三川爲

河南分長沙置桂陽郡三年置常山郡四年以黔布王

淮南國彭越王梁國改邯鄲爲趙國王張耳置沛汝南

二郡五年以盧縮王燕國置武陵郡六年以從父弟賈

王荆國弟交王楚國置江夏涿郡平原千乘豫章廣漢
定襄七郡九年并渭南中地河上三郡復爲內史十一
年以子友王淮陽國十二年改荆爲吳以兄子濞王吳
國置魏郡終高帝之世析置郡國更有清河勃海東萊
東海信都泰山中山七郡凡改國三增置者二十六其
河東太原上黨東郡潁川南陽南郡鉅鹿齊郡琅邪漢
中蜀郡巴郡隴西北地九原雲中雁門上郡代郡上谷
漁陽右北平遼東遼西薛郡長沙凡二十七郡如故又
十一年罷東郡頗益梁罷潁川郡頗益淮陽者因立子
恢爲梁王友爲淮陽王也然淮陽立二年卽徙趙梁立
十六年亦徙趙而志不言改置疑當時徑以二郡滋益

二王實未除二郡之目徙國之後仍復還漢故不致詳
焉高后元年改薛郡爲魯國王張偃其餘如故孝文二
年以趙幽王子辟疆王河間國齊悼惠子章王城陽國
興居王濟北國十六年以辟光王濟南國賢王菑川國
卬王膠西國熊渠王膠東國以淮南厲王子賜王廬江
國凡置國八孝景二年內史分左右以子闕王臨江國
彭祖王廣川國四年徙汝南王非王江都國中六年以
梁孝王子明王濟川國彭離王濟東國不識王濟陰國
定王山陽國又中二年置北海郡凡置郡國亦八孝武
建元六年開夜郎置犍爲郡元朔二年收河南地置朔
方郡四年置西河郡元狩元年置陳留郡二年以故匈

奴休屠王地置武威酒泉郡六年置臨淮郡元鼎三年
置天水安定郡四年置宏農郡以常山憲王子平王眞
定國商王泗水國六年以故匈奴昆邪王地置張掖敦
煌郡分桂陽置零陵郡定西南夷置越巂牂牁武都沈
黎文山郡定越地置南海鬱林蒼梧交趾合浦九眞日
南珠崖儋耳郡元封二年平西南夷未服者置益州郡
分淮南故鄣地置丹陽郡三年平朝鮮置元菟樂浪臨
屯眞番郡征和二年以趙敬肅王子偃王平干國凡置
郡國三十六又元朔元年置蒼海郡三年旋罷天漢四
年罷沈黎郡又元狩元年除淮南國爲九江郡二年改
衡山國爲六安國三年改江都國爲廣陵國元鼎元年

除濟東國爲大河郡凡改置郡國又四又太初元年分
內史爲京兆尹左馮翊右扶風是爲三輔孝昭始元六
年取天水隴西張掖郡各二縣置金城郡先一年臨屯
眞番儋耳三郡皆罷本紀又言元鳳五年罷象郡分屬
桂林牂牁然自高帝以來象郡地爲蠻夷所據孝武于
其處置日南郡並未別箸象郡之稱未知其何所指也
孝宣本始元年改膠西國爲高密國五鳳二年復平干
國爲廣平國甘露元年改大河郡爲東平國三年復廣
川國爲信都國凡改更者四又地節元年改楚國爲彭
城郡黃龍元年復故三年省文山郡并蜀孝元初元三
年罷珠崖郡孝平元始二年立代孝王元孫如意爲廣

宗王江都易王孫宮爲廣世王廣川惠王曾孫倫爲廣德王司馬彪郡國志鉅鹿郡有廣宗縣當卽如意之所封酈元注水經渦水東逕廣鄉城北圜稱曰襄邑有蛇邱亭故廣鄉矣改曰廣世當卽宮之所封廣德則卽丹陽黟縣惟廣德四年卽絕廣宗廣世王莽篡位以後始除是時莽又譯諷諸羌獻地置西海郡而志皆不別出蓋漢世增建郡國自昭宣以下無足道者志以元始二年冊籍爲斷故定郡止八十三國二十以孝武所置司隸校尉及十二部刺史監之亦云十三部也司隸校尉部監三輔宏農三河凡七郡豫州刺史部監潁川沛汝南梁魯凡三郡二國冀州刺史部監魏鉅鹿常山清河

趙廣平眞定中山信都河間凡四郡六國兗州刺史部監陳留山陽濟陰泰山東郡城陽淮陽東平凡五郡三國徐州刺史部監琅邪東海臨淮泗水廣陵楚凡三郡三國青州刺史部監平原千乘濟南北海東萊齊菑川膠東高密凡六郡三國荊州刺史部監南陽江夏桂陽武陽零陵南郡長沙凡六郡一國揚州刺史部監廬江九江會稽丹陽豫章六安凡五郡一國益州刺史部監漢中廣漢武都犍爲越巂益州牂柯巴蜀凡九郡涼州刺史部監隴西金城天水武威張掖酒泉敦煌安定北地凡九郡并州刺史部監太原上黨上西河朔方五原雲中定襄雁門凡九郡幽州刺史部監勃海上谷漁陽

右北平遼西遼東元菟樂浪代涿廣陽凡十郡一國交
 州刺史部監南海鬱林蒼梧交趾合浦九真日南凡七
 郡秦時曰監御史初省孝武復之其十二部元封五年
 所置司隸則征和四年置也至孝昭始元元年又改司
 隸之河內屬冀州河東屬并州斯為異耳紀載多端糾
 紛互起裴駮史記集解說秦三十六郡有鄣郡黔中攷
 秦本紀昭襄王三十年蜀守若伐取巫郡及江南為黔
 中郡是黔中昭襄之時郡名非始皇所置高帝本紀以
 東陽郡鄣郡吳郡五十三縣立劉賈為荆王以碭郡薛
 郡郟郡三十六縣立弟文信君交為楚王以膠東膠西
 臨淄濟北博陽城陽郡七十三縣立子肥為齊王秦無

東陽鄣吳郟及膠東膠西臨淄濟北博陽城陽諸郡皆
 是楚漢之間諸侯王自為割置非故立也不在三十六

郡之列此集解之誤

松按廿二史考異曰晉志以鄣郡

秦郡蓋楚漢之際所置也孝惠時齊王獻城陽郡為魯
 元公主湯沐邑高后割齊之濟南郡為呂王奉邑知城
 陽濟南二郡置於高帝矣晉書地理志漢祖龍興置郡國二十三曰

桂陽江夏豫章河內魏郡東海楚國平原梁國定襄泰
 山汝南淮陽千乘東萊燕國清河信都常山中山勃海
 廣漢涿郡攷河內本殷國故項羽本紀言立司馬印為
 殷王王河內都朝歌高帝不過復其故稱與改三川為
 河南邯鄲為趙荆為吳同例不在分置之列且志明言
 增二十六又明言沛武陵二郡為高帝置表明言荆淮

南二王為高帝立矣是置二十三之說非也又云文增
 厥九廣平城陽菑川濟南膠東膠西河間廬江衡山廣
 平孝武征和二年始置為平干國哀帝建平三年為廣
 平國孝文無此國也又云景加其四濟北濟陰山陽北
 海濟北孝文二年所置旋以王興居謀反國除孝景四
 年徙衡山王勃王之非孝景所始文景分置郡國各八
 志三各六六字誤耳然無此差參也松按廿二史考異曰文帝建國九濟
南城陽因舊郡濟北即泰山郡景帝建國九中山常山
清河因舊郡濟川國後廢故漢志以為文景各六錢氏
謂六為八又云武帝開越攘胡初置十七南海蒼梧鬱
 林合浦交趾九真日南珠崖儋耳牂柯越嶠沈黎文山
 犍為益州武都零陵拓土分疆又增十四宏農臨淮西

河朔方酒泉陳留安定天水元菟樂浪廣陵敦煌武威
 張掖攷廣陵孝武以江都改名亦不在分置之列沈黎
 一郡隨廢孝武所置郡國三十六實為三十五與所分
 三輔為三十八志云二十八二字誤耳然不止三十一
 也此晉志之誤松按廿二史考異曰南海鬱林日南即
真番蒼海後皆廢故漢志通典秦制天下四十郡漢加
不數錢氏謂二字誤亦非六十三與秦合百三攷志仍秦舊置者二十六郡高帝
 改置者仍二十五郡國高后改置者仍一國文帝改置
 者仍七郡國景帝改置者仍四郡國武帝改置者仍三
 十五郡國昭帝置者一郡宣帝改者四國凡漢所改置
 者仍七十七郡國然秦本無四十郡之說也此又通典

志曰金鑑
之誤至於張守節司馬貞章懷太子李吉甫樂史諸家
及地形州郡隋唐以下諸史志有可爲本志發明者卽
有顯與本志分背者今或隨手互正勿具論焉但志於
內史下云武帝建元六年分左右百官公卿表作景帝
二年當從表于張掖酒泉下云太初元年開武威下云
四年開敦煌下云後元元年分酒泉置與本紀皆不同
當從本紀匈奴傳云單于怒昆邪王休屠王居西方爲
漢所殺虜數萬人欲召誅之昆邪休屠王恐謀降漢漢
使票騎將軍迎之昆邪王殺休屠王并將其眾降漢是
元狩二年事也又云是時漢東拔濊貉朝鮮以爲郡而
西置酒泉郡以隔絕胡與羌通之路是元鼎六年事也

紀云元狩二年昆邪王降置五屬國以處之以其地爲
武威酒泉郡元鼎六年遣浮沮將軍公孫賀出九原匈
河將軍趙破奴出令居皆二千里不見虜而還乃分武
威酒泉地置張掖敦煌郡與傳說皆合惟云西置酒泉
郡誤耳賀以元朔五年封南窳侯元鼎五年坐酎金失
侯復以浮沮將軍出九原破奴以元狩二年封從票侯
元鼎五年坐酎金失侯後一歲爲匈河將軍攻胡無功
並見本傳與紀亦合于丹陽丹陽下云楚之先熊繹所
封十八世文王徙郢史記楚世家熊繹居丹陽徐廣穎
容並云在南郡枝江顧野王輿地志云秭歸縣東有丹
陽城周回八里熊繹始封也攷丹陽之丹陽元和郡縣

志以爲宣州當塗縣枝江則荊州縣秭歸則歸州縣也
括地志以下諸家並主秭歸自熊繹啟疆五世至熊渠
伐庸揚越至于鄂爭長南服不應履蹟東圻故注水經
亦有吳楚悠隔繼縷荆山無容遠在吳境之議焉于河
南中牟下云趙獻侯自耿徙此獻侯所徙不應在鄭地
中牟攷春秋傳晉趙鞅伐衛圍中牟是中牟爲衛地晏
子春秋晏子之晉至中牟是後爲晉所取與鄭南北相
去絕遠于南郡臨沮下云漳水出荆山東至江陵入陽
水陽水入沔陽水注水經作揚水云水上承江陵北注
于沔漳水出臨沮縣于當陽縣東南百餘里右會沮水
東南逕長城東東南流注于江是陽水自入沔漳水乃

入江耳是皆志之誤又于廬江下云金蘭西北有東陵
鄉攷禹貢汶山道江東別爲沱又東至于澧過九江至
於東陵東迤北會于滙東爲中江入于海說者皆以巴
邱當東陵以彭蠡當滙按沱在今枝江縣澧在今華容
縣九江今九江府也過九江始得東陵不應反出岳州
府之上且志明言在廬江矣江自今望江東流二縣境
始東迤北然則滙亦非彭蠡也北江今經流江南江今
吳松江中江自蕪湖縣下流逕高淳溧陽廣德宜興入
于震澤然則滙卽震澤耳于隴西氏道下云禹貢養水
所出東至武都爲漢于武都武都下云東漢水受氏道
水一名沔過江夏謂之夏水入江于沮縣下云沮水出

東狼谷南至沙羨南入江東漢有兩原一原出氏道曰漾水一原出沮縣曰沮水合爲漢水志于沮水下箸過郡行里于氏道下不復詳者明沮漢爲一也又于隴西西縣下云禹貢嶓冢山在西漢水所出南入廣漢白水東南至江州入江白水卽墊江水西漢亦有兩原一出廣漢甸氏道微外曰白水東至葭萌入漢一出嶓冢山志東漢于沙羨入江西漢于江州入江是二漢之分也證以禹貢嶓冢道漾東流爲漢證以山海經嶓冢之山漢水出焉東南流注于沔證以水經釋禹貢山川地名嶓冢山在氏道南諸說知二漢本出一原亦猶漆水同出俞山一流南入杜一流北入涇俱得漆水之名駱

水同出駱谷一流北入渭一流南入漢俱得駱水之名其例一耳漢氏道故縣在上邽下辨南北上邽之西南卽嶓冢下辨之東北亦嶓冢耳是養水爲東漢正原而東漢亦出嶓冢無疑也論者見志以嶓冢專屬之西漢而不言氏道水所出之山遂疑禹貢之文與志不合注水經者以庾仲雍云漢水至關城合西漢水又云諸言漢者多云西漢水至葭萌入漢又以常璩云西原會白水逕葭萌入漢以下流通之而不知上流亦無二出焉漢中記曰嶓冢以東水皆東流嶓冢以西水皆西流是以俗稱嶓冢爲分水嶺今西漢出嶓冢西水始西流東漢出嶓冢東水卽東流故易辨耳惟是水經以沮水爲

東漢正原注又以河池故道等水屬之西漢乃顯與志義不符而後世因之迷惑是所不解者一也又今兩當略陽二縣之間凡水皆應入東漢而並爲斜谷河所據其津通互亂不加關證其不解者二也又水經注有獻水卽庾仲雍所稱通東西二漢之水今山坂糾雜莫肯究求其所不解者三也又地形志華陽郡有幡冢縣隋書地理志漢川郡有西縣俱云縣有幡冢山隋西縣卽魏幡冢縣在今甯羌州故葭萌縣地也而並云有幡冢山者是求東漢之原于氏道而不得遂移漢之西縣于葭萌之地又妄指其縣有幡冢山通典因之亦謂幡冢有兩山一在天水上邽一在漢中金牛金牛卽隋西縣

後世通人咸爲所惑其不解者四也是東漢水之原以禹貢山海經暨志而定以水經暨注而始譌以魏隋二志暨通典而大謬于金城臨羌下云西北至塞外有西王母石室僊海鹽池有昆侖山祠攷禹貢織皮昆侖析支渠搜王肅云昆侖在臨羌蓋互證言之僊海卽西海王莽所置西海郡在此注水經云今謂之青海臨羌今西甯府故城在府城西二百餘里十六國春秋前涼張駿酒泉守馬岌上言酒泉南山卽昆侖邱也周穆王見西王母在此有石室王母堂珠璣樓嚴飾若神宮此一昆侖也臨羌西北直酒泉幾七百餘里而云酒泉南山者山在今肅州東南二百五十里正在西甯府之西故

得隸于臨羌耳于敦煌廣至下云宜禾都尉治昆侖障廣至在今肅州西沙州衛地此又一昆侖也然不言西王母國在此于河關下云積石山在西南河水出志無域外之談故河水始于此凡此皆足以破歷代之疑而增稽古之識者後人讀書卽爲迂遠者多乖信好拘守小言者又乏眞知班氏之書洵能發揮六經垂示百代而折衷之家絕少辨析之士無聞坵資稟愚魯獨學寡羣猶思于二千年前探願索隱惟班氏之書于郡國縣道而外凡山川奇異都邑鄉聚祠壇雜祀三代別國土地來往世系本末戶口官市風俗因革罔不畢具論注之體要在先覈故實并發新義輪廣之術尤爲最宜約

舉大綱蓋有八焉一曰攷故城杜預注春秋酈元注水經每詳遺蹟而注水經按引京相璠列國地名闕駟十三州志采擇尤精又通典括地志史記正義後漢書注元和郡縣志太平寰宇記等書所載故縣當備錄也二曰攷水道凡志云某水出某山入某水當以注水經條證之或有互異改流必據辨也三曰攷山經郡縣每多改易水道歷有遷移惟山則確乎不拔然古者水無定形山無定名水無定形而有定名山無定名而有定形當以無定者證有定有定者證無定彼此各證庶得其實凡志云在某縣南某縣北必以

本朝見在府聽州縣核表也四曰尊時制縣道地址亦

以見在府聽州縣核表也五曰正字音凡服虔應邵韋昭蘇林如淳孟康晉灼鄭德包愷伏儼蔡謨諸人音讀皆相傳舊說當具載也六曰改誤刊凡傳刻譌謬相沿脫落必校正補足也七曰破謬悠凡顏籀所妄注妄改妄音之處必盡削使勿存庶後人不疑惑也八曰闕疑闕凡所不知難求他助則闕之也究此八義乃無悖班氏之旨班書惟郡縣名大書他皆以細字分注今則俱進爲大字其分析語釋以次降格書之便于閱也班書本爲第八卷次上下今畫一至十六爲卷朔始于乾隆四十三年戊戌之歲以五十七年壬子之歲汗青始竟若夫後世諒余苦心則同志曰友亦惟德爲鄰矣是歲

之正月十有六日錢坫記

新斟注地里志目錄敘終

新斟注地里志卷第一

嘉定錢坫著

大興徐松集釋

昔在黃帝作舟車呂濟不通効行天下方制萬里畫壘分
州得百里之國萬區是故易稱先王呂建萬國親諸侯書
云協和萬國此之謂也堯遭洪水

許春說文解字洪洛水也洛水不遵道也史記作鴻水

字通也

王氏念孫曰建上本無呂字此後人依易象傳
加之也孟堅引易呂證上交百里之國萬區加

一呂字則累於詞
矣景祐本無呂字

襄山襄陵

襄古正字

天下分絕為十二州使禹治之

九州之名禹貢周官而下又有爾雅冀州之外有幽州以青州爲營州無梁州郭璞以爲是殷制說苑以營州爲青州餘與爾雅同尙書十二州僞孔傳以爲禹治水之後舜分冀州爲幽州并州青州爲營州與此云云不合恐非也

水土旣平更制九州列五服任土作貢

貢其書篇名也

曰禹敷土

卽禹乘四載之事也說文解字山行乘櫟水行乘舟陸行乘車澤行乘輶史記夏本紀作山行乘權水行乘船陸行乘車泥行乘橈河渠書作山行卽橋水行載舟陸

行載車泥行蹈毳溝洫志作山行則楬水行乘舟陸行載車泥行乘毳呂氏春秋作山行櫟水行舟陸行車塗行輶外又有沙行用鳩淮南子齊俗訓作山行肆水行舟陸行車泥行楯修務訓作山行藁水行舟沙行鳩泥行輶高誘淮南注作山行藁水行舟陸行車泥行藹徐廣史記注作山行橋水行船陸行車泥行藹皆異者蓋傳授家殊也沙卽陸塗卽泥船卽舟呂書別出沙行用鳩者非古車鳩字聲相同鳩卽車字櫟爲正字櫟櫟之省藁櫟之別其作權楬者則皆輦字之別也輦亦車名作肆者乃櫟字之借音作橋者又輦字之借義如莊子桔槔今本作桔槔輦輦亦聲相轉耳嚴助傳輿輶而隄

領臣瓚曰今竹輿車是也輻又橋之別字輻爲正字楯字通輻字別蒔亦借字毳又蒔之借楫亦毳之別諸字雖異義則同焉

隨山栞木

栞與刊字通用說文解字引作栞篆文作栞

奠高山大川

奠祭也

冀州既載壺口治梁及岐

壺口河東山梁左馮翊山岐右扶風山也

既脩太原

脩即修字本或作脩或作脩並同然修字爲正

至于嶽陽

即太嶽在河東

覃懷底績至于衡章

字同漳漳水過鄴縣以下稱衡漳

厥土惟白壤

壤柔土也釋名壤壤也肥濡意也依字厥應作昏經典

通借厥

厥賦上上錯厥田中中恒衛既從

二水在常山

大陸既作

澤在鉅鹿

鳥夷皮服

鄭康成曰東北之民賦食鳥獸者

夾右碣石入于河

碣石在右北平史記作入于海

洧河惟沅州

或作濟字非也洧水卽沅水沅古文作沿俗作竟者非

濟則常山水名今經典通用濟

允河旣道

名出爾雅志見者三成平徒駭東光胡蘇鬲縣鬲津在

今交河東光二縣及德州太史簡絜在今南皮縣馬頰

在今安德縣覆舖在今德州鉤盤在今樂津縣

雷夏旣澤

澤在洧陰

雍沮會同

鄭康成曰雍水沮水相觸而入澤中括地志水在雷澤

縣西北平地也當在今曹州府濮州東南

桑土旣蠶是降邱宅土厥土黑墳

方言青幽之間凡土而高且大者謂之墳

中絲木條

中古草字絲說文解字作繇云艸盛貌也絲俗字

厥田中下賦貞作十有三年迺同厥貢漆絲厥棊織文

史記作篚依義應是匪字匪竹器也所以盛方曰篚隋

曰匪應邵說篚為車笞之名棐為天棐謹斯之棐棐輔也皆非正字漆應作黍此借水名為之

浮于沛漂通于河

漂應作濕松按應作濕水在東郡

海岱惟青州嵎夷既略

嵎字應作嵎說文解字云嵎夷在青州陽谷日值之而出攷陽谷即賜谷亦云湯谷並字通也嵎夷史記作郁夷蓋即倭人之國也古郁與倭通如周道倭遲韓詩作郁夷是此東表之地居海之外故曰略云閻氏若璩改訂林氏之說曰河下流兗冀受之濟下流兗青受之淮下流徐揚受之江漢下流揚受之青雖近海惟濟於此入然不當眾流之衝但濰淄二水順其故道則其功畢矣比之它州用力最省也

惟留其道

惟即濰水在琅邪留即淄水在泰山

厥土白墳海瀕廣瀉

瀕即頻字省亦為頻也瀉即斥字之別也

田上下賦中上貢鹽絺海物惟錯岱畎絲枲鉛松怪石棗夷作牧

夷在東萊

厥棐檠絲

爾雅檠山桑檠絲即今之山繭也史記作會絲借字

浮于汶

水在泰山

達于沛海岱及淮惟徐州淮沂其父

沂水在泰山淮水在南陽

王氏念孫曰達本作通凡古文尚書皆作通漢書皆用今文故亦作通上文通于河是也史記亦作通其間有作達者皆後人以古文改之也

蒙羽其藝

蒙山在泰山羽山在東海藝應作執俗又作藝也

大壑既豬

大壑在山陽豬史記作都

東原底平

鄭康成曰今東平郡

厥土赤埴墳

說文解字埴黏土也釋名土黃而細密曰埴埴賦也言

如脂之膩也

草木漸包

說文解字作薪苞

田上中賦中中貢土五色

晉太康地記城陽姑幕有五色土封諸侯錫之茅土用

為社者即此土也

羽畎夏狄

狄史記作翟雉名字應作翟凡夷狄字史記等並多作

翟此又以翟為狄皆相傳書寫之譌也

嶧陽孤桐

山在東海

泗瀕浮磬

水在沛陰

淮夷蠙珠魚

說文解字作玼珠也宋宏曰淮水中出玼珠珠之有聲者

厥斐元纁編浮于淮泗達于河

此河說文解字為荷字即荷澤也在沛陰王氏念孫曰河當依說文

作荷尚書史記皆譌荷自韻會舉要始正其誤近世闢百詩胡融明言之益詳荷亦作荷下文道荷澤又東至于荷及濟陰郡下引禹貢荷澤是也

淮海惟揚州彭蠡既豬

澤在豫章

陽鳥適居

說文解字適讀若攸即此字

三江既入

南江北江在會稽中江在丹陽

震澤底定

澤在會稽

篠簜既敷

篠應作筱小竹也簜大竹也說文解字筱可為矢簜可

為幹

山天木喬厥土塗泥

塗應作涂俗字為塗

田下下賦下上錯貢金三品瑤瓊篠簜

說文解字作瑤琨云石之美者琨或從貫作瓊

齒革羽毛鳥夷卉服

史記作鳥夷

厥棊織貝厥包橘柚錫貢均江海通于淮泗荆及衡陽惟

荆州

荆山在南郡衡山在長沙

江漢朝宗于海

江水在蜀郡漢水在武都自漢水入江以後江水亦有

漢水之稱故曰江漢朝宗

閻氏若璩曰江所歷之州曰梁曰荆曰揚漢所歷之州曰

梁曰豫曰荆

九江孔殷

九江在豫章

沱潛既道

沱水在南郡此潛水相傳在今安陸府潛江縣東即蘆

伏河也縣以此得稱

雲夢土作乂

雲夢在南郡土即雲杜在江夏二地之名

厥土塗泥田下中賦上下貢羽旄齒革金三品棫幹栝栢

厲砥礪丹惟箇籛楛

楛應作枯楚詞云篋籛籛同篋箇之別字

三國底貢厥名包匭菁茅

匭卽簋字所謂爾貢包茅不入王祭不共無以縮酒者也縮說文解字作菑又周禮甸師祭祀共蕭茅鄭興曰蕭字或作菑菑讀爲縮又鄭康成郊特牲注云爾貢包茅不入王祭不共沛以酌酒云酌猶斟也酒已沛則斟之以入尊彝皆異者傳授殊也古聲菑蕭酌縮皆相同晉書地理志零陵泉陵縣有香茅古貢之以縮酒今辰州府麻陽縣東百四十里有包茅山出三春茅太平寰宇記云卽縮酒之物

厥棐元纁璣組九江納錫大龜

史記作入賜字通用也

浮于江沱灑漢逾于洛

水在宏農松按洛當作雜說詳王段兩先生書

至于南河荆河惟豫州伊雒澶澗既入于河

澶水出河南三水並出宏農

滎波既豬

二水並出河南史記波作播古字通閻氏若璩曰滎波解作二水自顏師古始蓋豫州之水惟洛與濟爲要害滎爲濟之溢流波爲洛之支流也松按伏生今文及馬鄭王波皆作播惟漢志作波僞孔因之百詩先生以六證考之斷當作播

道荷澤

亦應作荷澤松按五經文字云荷古本亦作荷

被盟豬

澤在梁國史記作明都本志作盟豬亦作望諸孟諸並

志卷第一
川○文

字通也

厥土惟壤下土墳壚

說文解字壚黑剛土也

田中上賦錯上中貢漆臬絺紵棊織纊

史記作織絮小雅纊綿也絮之細者曰纊既夕記注纊

新絮也

錫貢磬錯浮于洛入于河華陽黑水惟梁州

華山之陽也黑水即若水在益州

岷嶓既藝

岷應作巋山在蜀郡史記作汶嶓冢山在隴西

沱潛既道

此沱水在蜀郡有二潛水在巴郡

蔡蒙旅平

蒙山在蜀郡蔡大也

和夷底績

和即桓水也鄭康成曰和讀如桓水在蜀郡

厥土青黎田下上賦下中三錯貢璆鐵銀鏤咎磬熊羆狐

狸織皮西頃因桓是倮

倮當作來西頃山在隴西閻氏若璩曰西傾為西戎之

也貢

浮于潛逾于沔

水在武都

入于渭

水在隴西

亂于河黑水西河惟雍州

此黑水水經以為出張掖岷山南流至敦煌過三危山入南海應在今肅州西北而莫可攷據者也龍門之河曰西河雍依字當作邕雍雖之俗字

弱水既西

水在張掖

涇屬渭汭

水在安定涇水入渭之處曰渭汭

漆沮既從

即洛水也在左馮翊

鄠水迺同

水在右扶風

荆岐既旒

荆山在左馮翊

終南愔物

終南即太壹山愔物即岳山並在右扶風愔史記作敦

松按無極山碑云有終南之敦物與岱崇之栢及楊疏之樅缺滌蕩焉材用於是乎出官民於是乎給是漢人不以敦物為山名

至于鳥鼠

山在隴西

原隰底績至于豬蹙

澤在武威

三危既宅

鄭康成曰三危山在鳥鼠西南地道記云三苗所處宅

史記作度古字通今安西州

三苗丕敘

史記作序古字通五帝本紀曰三苗在江淮荆山舜遷

三苗于三危故雍州有三苗也今嘉峪關外舊沙州地

厥土黃壤田上上賦中下貢球琳琅玕浮于積石

山在金城

至于龍門西河

龍門山在左馮翊

會于渭汭

此渭汭則渭水入河之處也

織皮昆侖

山在金城

析支

應邵曰在金城河關之西東去河關千餘里在今西甯

府徼外

渠叟

在朔方

西戎卽敘道汧

山在右扶風

及岐至于荆山逾于河壺口雷首

山在河東

至于太嶽底柱

底柱山在宏農陝縣在今陝州四十里大河中

析城

山在河東

至于王屋

山在河東

太行

山在河內

恒山

山在常山

至于碣石入于海西頃朱圉

山在天水

鳥鼠至于太華熊耳

山在宏農

外方

即密高山在潁川

桐栢

山在南陽

至于倍尾

史記作負尾古字通山在江夏

道蟠冢至于荆山

山在南郡

丙方

山在江夏

至于大別

山在六安國

崤山之陽至于衡山過九江至于敷淺原

山在豫章

道弱水至于合黎

在張掖

餘波入于流沙

澤在張掖

道黑水

卽雍州之水

至于三危入于南海道河積石至于龍門南至于華陰東

至于底柱又東至于盟津

卽孟津十三州記河陽縣治河上卽孟津是也

東過洛汭

洛水入河之處在河南鞏縣也在今開封府汜水縣西

北

至于大伾

張晏曰河南成皋縣山也史記作邳在今汜水縣西北過洛水

水在信都志作絳

至于大陸又北播為九河同為迎河入于海

迎逆古聲同

錢氏大昕曰迎逆聲相近義亦不異宋子京改迎為逆於義雖通終失班氏之舊

蟠冢道漾東流為漢又東為滄浪之水

水經注漢水逕武當縣西北水中有洲名滄浪洲在今襄陽府均州北四十里

過三澁

水經三澁地在南郡鄖縣北沱在今襄陽府宜城縣東北

至于大別

此大別非六安國之山也元和郡縣志沔州漢陽縣魯山一名大別山在東一百步在今漢陽府城北

南入于江東匯澤為彭蠡東為北江入于海嶧山道江東別為沱又東至于醴

虞喜志林作澧云沅之別流也在武陵

過九江至于東陵

在廬江

東迤北會于滙東為中江入于海道沅水東流為沔入于河軼為滎東出于陶邱北

在沛陰

段氏玉裁曰史記水經注皆作沔為滎惟班志作軼衛包始改禹貢之沔為滎

又東至于荷

字亦應作荷

又東北會于汶

水在泰山

又北東入于海

史記作又東北

道淮自桐栢東會于泗沂東入于海道渭自鳥鼠同穴東會于鄆又東至于涇又東過漆沮入于河道洛自熊耳東北會于澗灋又東會于伊又東北入于河九州道同四奧既宅九山棐旒九川滌原九澤既陂四海會同六府孔修庶土交正底慎財賦咸則三壤成賦中國錫土姓祇台德

先不距朕行五百里甸服百里賦內總

史記作納亦古字通

二百里內銓三百里內夏服

夏史記作秭依義卽稽字也別作秭耳禮器注又作蘇亦別字此則借用夏戟字

四百里粟五百里米五百里侯服百里采二百里男國

史記作任國古字任男通用

三百里諸侯五百里綏服三百里揆文教二百里奮武衛五百里要服三百里夷二百里蔡五百里荒服三百里蠻二百里流東漸于海西被于流沙朔南臯聲教訖于四海禹錫元圭告厥成功後受禪于虞爲夏后氏殷因于夏亡

所變改周既克殷監于二代而損益之定官分職改禹徐
梁二州合之於雍青分冀州之地以爲幽并故周官有職
方氏掌天下之地辯九州之國東南曰揚州其山曰會稽
山在會稽

藪曰具區

卽震澤也

川曰三江寤曰五湖

五湖今松江也亦名笠澤春秋傳魯哀公十七年吳越
戰于笠澤史記孔子弟子列傳及越紐作戰于五湖是
也今蘇州府吳江縣東有水通澱泖諸湖者皆是

其利金錫竹箭民二男五女畜宜鳥獸穀宜稻正南曰荆

州其山曰衡藪曰雲夢川曰江漢寤曰潁湛

潁水在潁川湛水水經注出犍縣北魚齒山下爲湛浦
東逕汝水九曲北東入汝今出汝州東南魚齒山馬跑
泉至葉縣入汝

其利丹銀齒革民一男二女畜及穀宜與揚州同河南曰
豫州其山曰華藪曰圃田

澤在河南

川曰滎雒寤曰波滎

波水在今汝州魯山縣東南入滎之水也馬融廣成頌
浸以波滎水經注以爲此是矣按波水小滎水大波水
自合滎水滎水卽有波水之稱是此波卽滎耳在南陽

澁水說文解字云在漢南左傳修塗梁澁攻既在漢南不當是豫州濩矣解字以潁湛爲豫州濩以澁爲荊州濩疑周禮有異本今水在德安府隨州東

其利麻漆絲枲

周禮麻作林鄭康成注林竹木也

民二男三女畜宜六擾

擾應爲獲字蓋柔謹之意鄭康成云六擾馬牛羊雞犬豕也

其穀宜五種

鄭康成云五種黍稷菽麥稻也

正東曰青州其山曰沂

卽艾山也爲沂水之所自出古聲沂艾亦相同

藪曰孟諸川曰淮泗濩曰沂沐

沐水在琅邪鄭康成云鄭司農以淮爲睢沐爲洙

其利蒲魚民二男三女

周禮作二男二女鄭康成注二男二女數似誤也當與堯州同二男三女

其畜宜雞狗穀宜稻麥河東曰沅州其山曰岱藪曰秦壑卽鉅野也周禮作大野

其川曰河沛濩曰盧濩

濩卽上惟也盧水經注以爲卽久台水亦在琅邪鄭康成讀盧爲雷讀濩爲雍以爲雷澤雍沮

其利蒲魚民二男三女畜宜六擾穀四種
鄭康成云四種黍稷稻麥也

正西曰雍州其山曰嶽
卽沂山也

藪曰弦蒲
在右扶風鄭康成云鄭司農讀弦爲沂蒲爲浦

川曰涇汭
詩芻鞠之卽鄭康成箋芻之言內也水之內曰隩外曰

鞠爾雅屋內爲隩外爲隈說文解字隩作澳隈卽所云
鞠矣水在右扶風

竈曰渭洛其利玉石其民三男二女畜宜牛馬穀宜黍稷

東北曰幽州其山曰醫無閭

山在遼東

藪曰獫狁

在琅邪王氏念孫曰獫本作奚此後人依職方氏文改之杜子春讀獫爲奚是奚爲本字獫爲借字故

班志作奚下文琅邪郡長廣奚養澤在西幽州藪是其證說文藪字注及風俗通義並作奚若志文作獫則注當云獫音奚今注內無音則本是奚字明矣

川曰河滹蓐曰蓐時

卽上留也留蓐同字時水卽如水在齊郡

其利魚鹽民一男三女畜宜四擾穀宜三種

鄭康成云四擾馬牛犬豕三種黍稷稻也

河內曰冀州其山曰霍

卽大嶽也

藪曰揚汙

山海經所謂陽華之山門水出焉者也爾雅云秦有陽
陁亦是在今陝州閩鄉縣

川曰漳

卽上章也水在上黨

瀋曰汾潞

汾水在太原潞水上黨潞縣是也水經注以爲卽漳水
其利松栢民五男三女畜宜牛羊穀宜黍稷正北曰并州

其山曰恒山藪曰昭餘所

澤在太原呂氏春秋曰大昭是也

川曰葷池

在代郡

嘔夷

卽滌水在北地松按師古注曰嘔夷出平舒錢氏大所

夷當嘔夷也然孟堅實以滌水爲嘔夷故於代郡靈邱
縣云滌河東至交安入大河并州川而於平舒之祁夷
水不云并州川是班與鄭異也
顏注雖宗後鄭卻失孟堅之旨

瀆曰涑易

涑水在代郡易水在涿郡

其利布帛民二男三女畜宜五擾

鄭康成云五擾馬牛羊犬豕也

穀宜五種而保章氏掌天文呂星土辨九州之地所封封

域皆有分星呂視吉凶周爵五等而土三等公侯百里伯
七十里子男五十里不滿爲附庸蓋千八百國而太昊黃
帝之後唐虞侯伯猶存帝王圖籍相踵而可知周室旣衰
禮樂征伐自諸侯出轉相吞滅數百年間列國耗盡至春
秋時尙有數十國五伯迭興總其盟會陵夷至于戰國天
下分而爲七合從連衡經數十年秦遂并兼四海呂爲周
制微弱終爲諸侯所喪故不立尺土之封分天下爲郡縣
盜滅前聖之苗裔靡有子遺者矣漢興因秦制度崇恩德
行簡易呂撫海內至武帝攘卻胡越開地斥境南置交趾
北置朔方之州兼徐梁幽并夏周之制改雍曰涼改梁曰
益凡十三部置刺史先王之迹旣遠地名又數改易是以

采獲舊聞考迹詩書推表山川呂綴禹貢周官春秋下及
戰國秦漢焉中古以來說地里者多矣或解釋經典或撰
述方志競爲新異妄有穿鑿安處附會頗失其眞後之學
者因而祖述曾不攷其謬論莫能尋其根本今並不錄蓋
無尤焉

新輯注地里志卷第一終

新輯注地里志卷第二

嘉定錢坫著

大興徐松集釋

京兆尹故秦內史高帝元年屬塞國

司馬欣國也史記項羽本紀亦曰秦章昭曰桃林塞三

秦記塞在長安東四百里今同州府潼關同知以東南

是其地閻氏若璩曰秦之內史治咸陽縣漢更名曰渭城漢之內史則治長安城中

二年更為渭南郡

史記高帝本紀二年置渭南郡異姓諸侯王表以為元

年八月

九年罷復為內史武帝建元六年分為右內史

百官公卿表以為景帝二年

齊氏召南曰分左右內史志與表異師古謂據史記

知志誤然考史記景紀二年秋但云置內史役祔為縣未云分置左右內史也未知師古何據若據本書表則孝景元年即書中大夫鼂錯為左內史矣

太初元年更為京兆尹元始二年戶十九萬五千七百二口六十八萬二千四百六十八縣十二

長安高帝五年置

在今西安府城西北十五里俗呼之為楊家城即漢長安故城元和郡縣志故城在長安縣西北十三里史記漢興以來將相名臣年表作六年置

惠帝元年初城六年成

惠帝紀元年春正月城長安三年春發長安六百里內男女十四萬六千人城長安三十日罷六月發諸侯王

列侯徒隸二萬人城長安五年春正月復發長安六百里內男女十四萬五千人城長安三十日罷九月城成戶八萬八百口二十四萬六千二百王莽曰常安

新豐

在今西安府臨潼縣東十五里新豐鎮是元和郡縣志故城在昭應縣東十八里

驪山在南

山在今臨潼縣南一里字或作麗又作鄰同

故驪戎國秦曰驪邑

史記始皇十六年置驪邑太平寰宇記驪戎故城在昭應縣東二十四里

段氏玉裁曰云故驪戎國者綴春秋也秦曰作莽曰

高祖七年置

史記本紀作十年十字誤為七也應從本紀

船司空

在今同州府華陰縣東北十五里通典船司空故城在

今華陰縣東北十五里三輔黃圖有船庫官後改為縣

莽曰船利

藍田

在今西安府藍田縣西三十里長安志故城在今縣西

三十里

山山美玉

山在今縣東南三十里

有虎候山祠秦孝公置也

史記六國表以為秦獻公六年為縣

華陰

今同州府華陰縣

故陰晉秦惠文王五年更名甯秦

史記秦本紀及六國表並作六年華山記曰華山界秦

晉之境晉之西鄙則曰陰晉秦之東邑則曰甯秦

曰陰晉見戰國云故陰晉者所謂下及戰國秦漢也

高帝八年更名華陰太華山在南

山在今縣南十里華說文解字作華今通用華

耳按大華山之上當有禹貢二字傳寫者奪之

有祠

宣帝置今祠在縣東五里

豫州山

周禮職方氏說凡山川藪漫皆本周禮下並同段氏玉裁曰凡

言某州山某州川某州藪者皆以釋職方氏綴周官也

集靈宮武帝起莽曰華壇也

松按西嶽華山廟碑云孝武皇帝修封禪之禮思登假之道巡省五嶽禮祀豐備故立宮其下曰集靈宮壁曰存僊壁門曰望僊門

鄭

在今同州府華州西北三里元和郡縣志故城在今縣理西北三里秦武公十一年置也

周宣王弟鄭桓公邑

詩譜周宣王封母弟友於宗周畿內咸林之地世本作械林咸械字形相近而誤也

有鐵官

今華州南山商洛之間出鐵

湖

在今陝州閩鄉縣東四十里後漢書注故城在今號州

湖城縣西南元和郡縣志在南二里日知錄左傳云許君焦瑕焦瑕為晉

河外五城之二古瑕胡二字通用瑕轉為胡又改為湖瑕邑即桃林之塞也

有周天子祠二所故曰胡

封禪書於湖有周天子祠攷胡周厲王名或天子祠即

厲王祠歟四夷縣道記故城在湖城縣西南十里

武帝建元元年更名湖

原本少一元字從太平寰宇記加以胡為周天子名故

更之曰湖段氏玉裁曰胡者大也見釋故蓋周時舊名也武帝嫌其為匈奴之偶易之

下邳

在今西安府渭南縣北四夷縣道記故城在今縣東南二十五里攷今渭南縣北五十里有下邳鎮卽縣道記所稱之縣非漢縣也水經注渭水逕下邳縣故城南與竹水合是縣在渭竹二水之間矣應邵曰秦武公伐邽戎置有上邳故稱下蘇林音邽為圭余按武公伐邽戎不聞遷其人於此因邽戎而置縣未免以遼遠不關封

禪書櫟陽雨金秦獻公自以為得金瑞故作畦時櫟陽

而祀白帝疑畦字從圭而邽字亦從圭此下邳之邽當

為畦時之畦也又櫟陽下邳地境相涉秦本紀獻公二

年城櫟陽六國表十一年縣櫟陽皆卽此櫟陽也舊說

以為雨金之櫟陽在隴西西縣為今秦州西南地則更

非矣段氏玉裁曰隴西有上邽故曰下邽地勢有高下也邽古畦切

南陵

在今藍田縣西通典長安志並云故城在萬年縣東南

二十四里太平寰宇記在白鹿原上

文帝七年置

史記景帝本紀二年置南陵縣百官公卿表南陵文帝

置蓋文帝時置陵景帝時置縣也薄太后以孝景前二
年崩以呂后会葬長陵故特自起陵近皇文皇帝霸陵
以在霸陵南故曰南陵也廟記在霸陵南十里

澹水出藍田谷北至霸陵入霸水

澹舊本作沂字之誤也今改正說文解字澹水出京兆

藍田谷今澹水出藍田縣南秦領合荆谷庫谷採谷石

門谷等水下流逕咸甯縣東南入霸段氏玉裁曰按水經注渭水篇泥水

澹水皆出藍田谷入霸此作沂水沂蓋泥之聲誤也沂

又誤析故師古音先歷反矣此當云泥水澹水皆出藍

田谷北至霸陵入霸今本脫澹水灑所據脫泥水故敘

泥水不引志文而澹水篇引志文也然據宋敏求長安

志則灑注述泥水所脫多矣安知不在所脫中也今正

沂作泥又補澹庶合松按經韻樓集說與錢氏同此條

據先生手蹟札記未

知二者孰為定說

功視子孫

霸水亦出藍田谷北入渭古曰茲水秦穆公更名以章霸

今霸水出藍田縣南秦領合藍谷傾谷輞谷白馬谷等

水下流至高陵縣南界入渭霸澹二水即長水也漢于

此置校尉其水得比大川之禮置祠依字應作伯說文

解字作灞潘岳云元霸素澹以元霸為稱而霸水本名

茲水是茲字從二元左傳曰何故使我水茲茲者黑也

非艸木滋生之字矣視讀如示段氏玉裁曰古曰茲水各本上行師字茲子之

奉明

在今西安府城北八里長安志故城在長安縣北八里

宣帝置也

因宣帝皇考史皇孫陵而置縣也本紀元康元年益奉明園戶為奉明縣水經注奉明縣本成鄉之廣明苑史皇孫及王夫人葬於郭北宣帝遷苑南卜以為悼園益園民千六百家立奉明縣以奉二園今水經注本字或誤武五子傳廣明有成鄉可以互證

霸陵

在今西安府城東北二十五里水經注在長安縣東南三十里括地志在新豐縣西南三十五里元和郡縣志在萬年縣東二十里太平寰宇記在咸甯縣東北三十里

故芷陽

三秦記鹿原東有霸川之西坂故芷陽也史記秦始皇本紀作蒞陽芷蒞古字通攷霸陵在霸水之西霸水古曰茲水水之西北曰陽是芷陽即茲陽矣古字芷茲字同聲亦通用

文帝更名

文帝陵也史記年表云九年置

莽曰水章也

杜陵

在今西安府城東南二十里元和郡縣志故城在萬年縣東南二十里太平寰宇記在東十五里

故杜伯國

周宣王臣事見墨子後漢書注杜伯國在萬年縣東南宣帝更名

宣帝陵也秦曰杜縣史記秦武公十一年置宣帝本紀元康二年以杜東原上為初陵更名杜縣曰杜陵臣瓚曰杜陵在長安南五十里三輔黃圖帝在民間時好游鄠杜故葬此

有周右將軍杜主祠四所

封禪書於杜亳有三杜主之祠郊祀志作五郊祀志是也杜主有五祠成帝置其一故此云四所耳史記秦本紀甯公二年遣兵代蕩社徐廣曰蕩一作湯社一作杜

廣說是蕩社即湯杜湯杜亦即唐杜晉士句云在周為

唐杜氏者即湯杜矣說文解字京兆杜陵有亳亭蓋秦

杜戰於此

段氏玉裁曰杜亳者謂京兆杜縣有亳亭也其地有杜主祠三志并雍營廟一祠而總之

曰杜主祠四所右將軍即杜伯也

莽曰饒安也

左馮翊故秦內史高帝元年屬塞國二年更為河上郡

史記本紀二年置河上郡異姓諸侯王表元年八月

段氏玉裁曰馮音憑塞先代切塞國者項羽立司馬欣為塞王章昭曰在長安東名桃林塞決錄注曰馮憑也翊明也按翊明也謂翊為昱之假借也音同昱不音翼

九年罷復為內史武帝建元六年分為左內史太初元年更為左馮翊戶二十三萬五千一百一口九十一萬七千

八百二十二縣二十四

韓延壽傳云二十四縣松按左馮翊右扶風皆治長安中見趙廣漢傳

高陵

在今西安府高陵縣西南二里括地志通典並云故城

在高陵縣西南一里長安志在西一里閻氏若璩曰左馮翊雖先書高

陵縣而高陵不為治治長安城中以趙廣漢傳及景帝紀注百官公卿表注知之而韓延壽傳云延壽為左馮翊出行縣至高陵證最分明

左輔都尉治

百官公卿表武帝元鼎元年更置三輔都尉

莽曰千春

櫟陽

在今西安府臨潼縣東北七十里攷縣有櫟陽鎮非漢

城也括地志故城在今縣東北所稱今縣即鎮是也鎮

在臨潼縣東北五十里如淳蘇林音櫟為藥司馬欣都

段氏玉裁曰如淳蘇林音櫟為藥漢郡縣名字多異讀殆因其郡縣方語之舊

秦獻公自雍徙

獻公二年城之十一年為縣

莽曰師亭

王莽時郡縣以亭名者三百六十此其一也

翟道

在今鄭州中部縣西北四十里通典坊州中部縣漢翟

道縣地太平寰宇記故城在中部縣西北四十里段氏玉裁

曰百官公卿表
縣有蠻夷曰道

莽曰渙

池陽惠帝四年置

在今西安府三原縣東北二十里後漢書注故城在涇陽縣西北元和郡縣志在西北二里應邵曰在池水之陽今其地無此水

截嶽山在北

今俗呼之為峩峩山在今西安府涇陽縣北五十里倉頡篇塋大阜在縣北塋與截嶽字聲相近即此

夏陽

在今同州府韓城縣西南二里太平寰宇記故城在韓

城縣西南二里

故少梁

在今韓城縣南二十里今芝川鎮有城即其地國都城記梁伯國嬴姓之後與秦同祖秦穆公滅之史記魏文侯六年城少梁括地志元和郡縣志並云梁國在韓城縣南二十二里

秦惠文王十一年更名

史記惠文君十一年更名少梁曰夏陽

段氏玉裁曰少梁見春秋左氏

傳此綴
春秋也

禹貢梁山在西北

山在今韓城縣西北九十里括地志在韓城縣東南十

九里爾雅梁山晉望段氏玉裁曰禹貢梁山謂冀州治梁及岐之梁禹貢梁山祇見於此東原師云此冀州之梁岐非雍州之梁岐也汾西河東自燕京別而南離石水所出曰梁山黃櫨之南勝水所出曰岐山說詳水地記及汾州府志然則班時說治梁已非經情矣

龍門山在北

山在今韓城縣東北八十里魏土地記梁山北有龍門

山段氏玉裁曰此釋禹貢冀州之梁雍州及道河之龍門凡言禹貢某山禹貢某水者視此所謂綴禹貢也

有鐵官莽曰冀亭

衙

在今同州府白水縣東北六十里通典後漢書注並云故城在今同州白水縣東北太平寰宇記東北六十里春秋時彭衙也如淳讀衙爲牙

莽曰達昌

粟邑

在今白水縣西北三十里後漢書注在同州白水縣西北元和郡縣志西北二十八里薛宣傳所稱縣小僻在山中者是也

莽曰粟城

谷口

在今西安府醴泉縣東北四十里通典故城在醴泉縣北括地志後漢書注太平寰宇記並云在東北四十里公孫卿所謂寒門谷口者是也史記將相名臣年表孝文後三年置邑松按原涉傳舉能治劇爲谷口令

九變山在西

山在今醴泉縣西北六十里

有天齊公

封禪書天主祠天齊八神之一也蘇林以為當天齊中

央故曰天齊

段氏玉裁曰齊同臆

五牀山僊人五帝祠四所

郊祀志京師近縣鄠則勞谷五牀山日月五帝僊人玉

女祠並宣帝置本志鄠縣下無之蓋載在此耳稍異五

牀山疑即今之武將山在醴泉縣西北十八里

莽曰谷喙

蓮勺

在今西安府渭南縣北七十里地名蓮勺鎮後漢書注
故城在同州下邽縣東北元和郡縣志在縣東二十二
里如涪音輦酌水經注作蓮勺十三州志曰以艸受名
也

鄭

今鄭州并洛川縣地字或作鄭非也孟康音敷如涪音
孚封禪書謂鄭衍即其地李奇曰三輔謂山阪曰衍史
記秦始皇本紀有慶公應邵曰慶秦邑秦邑別無名慶
者當此耳古字鄭慶同用

段氏玉裁曰各本作鄭今依說文解字作鄭慶聲轉而為

敷相近鹿聲較遠

莽曰修令

頻陽

在今西安府富平縣東北五十五里括地志故城在同官縣界後漢書注在美原縣西南元和郡縣志在西南三里應邵曰在頻水之陽水經注縣之左右無水城北有頻山當在頻水之陽也薛宣傳頻陽北當上郡西河為數郡湊

秦厲公置

厲公二十一年置

臨晉

今同州府城括地志同州本臨晉城一名大荔城亦曰馮翊城後漢書注故城在朝邑縣西南

故大荔

元和郡縣志大荔國在朝邑縣東三十里東字當誤今同州府城正在朝邑縣西三十里耳

秦獲之更名

史記秦厲共公十六年以兵伐大荔取其王城

有河水祠

封禪書河祠臨晉宣帝置宣帝皆因秦之舊而更祠耳括地志大河祠在朝邑縣南三十里

芮鄉故芮國

芮伯萬國也在今同州府朝邑縣南

莽曰監晉

重泉

在今同州府蒲城縣南四十五里三秦記故城在馮翊
縣西北三十里括地志在蒲城縣東南四十五里在同
州西北亦四十五里元和郡縣志奉先縣本漢重泉縣
西魏曰蒲城

莽曰調泉

郃陽

在今同州府郃陽縣東四十里括地志故城魏文侯十
七年築在河西縣南五里太平寰宇記在今縣南二十
里應邵曰在郃水之陽也詩在洽之陽說文解字作郃
漢高帝封劉仲為郃陽侯相傳以為在此縣故今縣西

猶有劉仲城水經注亦云攷漢制三輔地例不封列侯
平原郡亦有合陽縣字作合表劉仲封合陽侯亦作合
不作郃疑是平原之縣而非此焉

祿禰景帝二年置

在今西安府耀州東北一里元和郡縣志故城在華原
縣東南十里長安志太平寰宇記並云在縣東北一里
元和志寫本多誤或非也祿鄒誕生音都會反

武城

在今同州府華州東十三里括地志武城一名武平城
在鄭縣東北十三里

莽曰桓城

沈陽

在今華州東北十五里太平寰宇記故城在鄭縣東北十五里水經注渭水又東與東石橋水會故沈水也據此則縣在渭水南沈水北矣舊志家云在渭水北者非段氏玉裁曰戴氏水經注改作沈陽謂即瀟水也今按恐誤漢書作沈疑有沈水水經注渭水篇西石橋水會北流注於渭渭水又東與東石橋水會故沈水也逕鄭城東又北逕沈陽城北注於渭

莽曰制昌

襄德

在今西安府富平縣西南十里攷括地志太平寰宇記並云襄德故城在朝邑縣西南水經注渭水之陽即襄德縣界也城在渭水之北沙苑之南世謂之高陽城按

括地寰宇二書皆因水經注而誤耳今朝邑縣界無荆

山荆渠有洛水入河無漆沮水入渭說非也

段氏玉裁曰襄懷古

今字松按襄德所在當以閻氏若璩及胡氏渭說在朝邑縣西南者為正閻氏若璩親至朝邑縣縣治在強梁原上為荆山北麓即水經注所云朝坂也然則錢氏謂朝邑無荆山誤矣高陽城段氏玉裁謂即襄德縣故城

禹貢北條荆山在南

山在今富平縣西南十里禹貢道九山汧壺口砥柱太行西頃熊耳嶓冢內方岐也古分為三條馬融以汧為北條西頃為中條嶓冢為南條鄭康成分為四列汧為陰列西頃次陰列嶓冢為陽列岐山次陽列段氏玉裁曰此釋道汧及岐至于荆山之荆山也此曰北條荆山南郡曰禹貢南條荆山則知三條之說自古而然

下有荆渠原

原在今富平縣北二十里舊本荆渠作彊梁誤也依水經注改正

洛水東南入渭

闕駟以為漆沮之水也今漆水出同官縣北高山西南流合銅官川水雷平川水又西南逕耀州東而與沮水會沮水出中部縣西北山南流分為二一流東出逕中部縣南入於洛一流逕宜君縣西為宜君川水又逕同官耀州西與漆水會下流曰石川河折而東逕荆山之陰而注於渭其得統名之曰洛水者因沮水一流注洛沮原有洛水之稱故因其名名之也段氏玉裁曰此非北地歸德下云洛水出北蠻夷中入河者也入渭以入河故渾言之曰入河水經曰又東過華陰縣北洛水入

雍州漫莽曰德驩

焉松按以漆沮為洛始于小顏然地理志有沮水出北地直路縣西東入洛之交水經注亦明言沮水漆水所

徵

在今同州府徵城縣西南二十五里地名北徵城春秋傳取北徵者是也太平寰宇記故城在徵城縣西南二十里韋昭音徵段氏玉裁曰左傳文十年泰伯伐晉取北徵音義曰三蒼云縣屬馮翊音

徵一音張里反

莽曰汜愛

雲陵

在今邠州涪化縣北二十里括地志在雲陽縣西北

昭帝置

昭帝母趙婕妤陵也本紀追尊趙婕妤為皇太后起雲陵文穎曰婕妤先葬於雲陽是以就雲陽起陵按今土人往往於故陵得長母相忘瓦當應是武帝葬婕妤時所製也

萬年

在今西安府臨潼縣東北七十五里元和郡縣志故城在今櫟陽縣東北三十五里太平寰宇記云二十五里

高帝置

太上皇陵也本紀十年秋七月太上皇崩葬萬年三輔黃圖高祖初居櫟陽故太上皇因在櫟陽十年崩葬其

北原起萬年邑置長丞

莽曰異赤

長陵

在今西安府咸陽縣東三十五里元和郡縣志故城在咸陽縣東北四十里

高帝置

高帝陵也史記年表十二年置皇甫謐曰長陵山東西廣百二十步高二丈在渭水北關中記高祖陵在東呂后陵在西元和郡縣志陵在咸陽縣東北三十里蕭何冢在陵之東長安志在縣東三十五里

戶五萬五十七口十七萬九千四百六十九

蔡邕樊陵頌前漢戶五萬口十有七萬王莽後十不存

一

莽曰長平

陽陵

在今西安府高陵縣西南三十里括地志故城在咸陽縣東三十里元和郡縣志云四十里

故弋陽景帝更名

景帝陵也五年更名皇甫謐曰陽陵山方一百二十步高十四丈

莽曰渭陽

雲陽

在今邠州涪化縣西北五十里括地志故城在雲陽縣西八十里元和郡縣志在西北八十里攷今涇陽縣西北七十里有雲陽鎮唐縣也漢縣更在西北

有休屠金人

史記匈奴傳驃騎將軍去病擊匈奴得休屠王祭天金人韋昭曰作金人以爲祭天主崔浩曰胡祭以金人爲主今浮圖金人是也孟康曰匈奴祭天處本在雲陽甘泉山下秦奪其地後徙之休屠王右地故休屠有祭天金人孟說非也

及徑路神祠三所

匈奴寶刀名徑路

越巫酤鄭祠三所

孟康曰酤音辜磔之辜越人祠也鄭音禳高祖時長安置巫祝官女巫有梁巫晉巫秦巫荆巫九天巫諸名越巫亦其類說文解字酤卽辜字封禪書越人勇之言東甌王敬鬼壽百六十歲乃令越巫立越祝祠祠天神上帝百鬼而以雞卜當卽此祠也劉氏台拱曰辜亦磔也酤鄭卽磔攘古文辜從死旁古死與卯字形相近因誤從卯鄭攘皆假借字禳乃正字周禮女祝掌以時招梗禳禳之事注云四禮唯禳其遺象今存漢有酤鄭法故鄭云遺象今存松按酤段校作酤

右扶風故秦內史高帝元年屬雍國

章邯國也

松按尹翁歸傳豪強有罪輸掌畜官師古曰扶風畜牧所在有苑師之屬故曰掌畜官

二年更爲中地郡九年罷復爲內史武帝建元六年分爲

右內史太初元年更名主爵都尉爲右扶風

百官公卿表主爵中尉秦官景帝中六年更名都尉武

帝太初元年更名右扶風

戶二十一萬六千三百七十七口八十三萬六千七百七十
二十一

渭城

在今西安府咸陽縣東北二十里通典後漢書注並云故城在咸陽縣東北括地志在縣東十五里元和郡縣志在東二十二里

故咸陽

秦孝公都此

高帝元年更名新城

史記曹參世家參東取咸陽更名曰新城

七年罷屬長安武帝元鼎三年更名渭城有蘭池宮

今宮在咸陽縣東二十五里土人往往於故址得宮瓦

文作蘭池宮當四字三秦記始皇鄠長安引渭水為池

築為蓬瀛刻石為鯨長二百丈逢盜之處也

莽曰京城

槐里

在今西安府興平縣東南十里括地志故城在始平縣

東南十里元和郡縣志在興平縣東南十里水經注縣

南對渭水北背通渠

周曰犬邱懿王都之

宋忠曰懿王自鎬徙都之

秦更名廢邱

韋昭曰周時犬邱秦欲廢之故曰廢邱亦曰舒邱章邯

都此

高祖三年更有黃山宮孝惠二年起

今宮在興平縣西南三十里馬嵬坡土人往往于故址

得宮瓦有黃山二字元和郡縣志宮在興平縣西南三

十里

莽曰槐治

鄠

今西安府鄠縣元和郡縣志故城在今縣北二里
古國有扈谷亭扈夏啟所伐

說文解字曰縣有扈谷甘亭馬融曰甘有扈氏南郊地
名王逸曰澆國名有扈解字分鄠扈為兩字與本志義

合訓纂合為一字者非王氏念孫曰當作有扈谷甘亭

西亭在水東鄠縣南夏啟伐有扈作誓於是亭松按古

國段校作古扈國依元和郡縣志補謂在古為扈國也

扈鄠古今字字異音同尚書作扈秦漢作鄠皆胡古切

鄠水出東南

今水出縣南山鄠谷西北流與交水會交水者瀟水也
又與漉池水合而入於渭文王作邑於鄠即其地元和

郡縣志周鄠宮在縣東三十五里字或作豐亦作灃同

又有瀟水今灃水出縣東南三十里

今瀟水出縣南山瀟谷北流合漢陂栗谷扈谷等水入

于渭子虛賦謂之潦水也古字通用本皆作瀟水者非

瀟水出杜陵合于鄠不在此王氏念孫曰據說文水經

苑入渭者乃瀟水非瀟水則此志當作瀟瀟字或作林

沈譌作沈師古但知沈為沈之訛而不知瀟為瀟之訛

也松按瀟水今漢書本皆作瀟水段氏王裁曰瀟音聿

瀟水亦名沈沈水沈今音亮允與聿雙聲也李善注上林

賦曰瀟水出杜陵今名沈沈水尚不誤小顏字誤為沈

因謂瀟瀟沈沈譌沈而戴先生校水經注盡改沈水為

沈水不知沈乃沈之誤耳

皆北過上林苑入渭有蕢陽宮秦文王起

宮在今縣東三十里東方朔傳作倍陽李斐音蕢為倍

攷說文解字云縣有鄜鄉讀若倍是鄜卽蕢蕢卽倍矣
說苑以爲秦始皇遷太后之處

蓋屋

在今西安府蓋屋縣東三十里地名終南鎮元和郡縣
志終南縣城卽漢蓋屋故城也薛綜曰蓋屋山名依字

屋當爲屋說文解字曰屋礙止也無屋字段氏玉裁曰蓋張流切

陟栗切二字皆見說文屋從广俗從厂非也廣韻曰水曲曰蓋山曲曰屋集韻山水字互易按蓋屋與周折同音周旋中規折旋中矩山水皆兼有之

有長楊宮有射熊館秦昭王起

長楊宮在今縣東南三十里三輔黃圖長楊宮門曰射

熊館

靈輶渠武帝穿也

水經注縣北有蒙籠渠上承渭水于鄜縣東逕武功縣

爲成國渠東逕縣北爲靈輶渠溝洫志關中靈輶成國

漳渠引諸川如涓曰靈輶在蓋屋引諸川河渠書作引

堵水

葦

在今乾州武功縣西南二十里後漢書注故城在武功

縣括地志元和郡縣志並云故葦城一名武功城在武

功縣西南二十二里段氏玉裁曰后稷封於郃土來切其地有葦鄉亦作葦鄉漢以名縣

葦鄉之名必起於古必因語我來牟而有此字蓋葦卽來字音葦亦音來也郡國志無葦縣而鄜縣有郃亭併入於鄜矣松按后稷所封其地有葦鄉卽郃也

周后稷所封

說文解字部炎帝之後姜姓所封周弃外家國右扶風
棧縣是也古字棧部同聲通用又春秋傳魏駘芮岐畢
駘亦部字

郁夷

在今鳳翔府隴州西五十里太平寰宇記故城在汧原

縣西五十里大甯關

松按陳遵傳舉遵能治
三輔劇縣補郁夷令

詩周道郁夷

韓詩也毛氏作倭遲

有汧水祠莽曰郁平

美陽

在今鳳翔府扶風縣北二十五里地名崇正鎮後漢書
注故城在武功縣北七里太平寰宇記在西四十里攷
今武功縣西北七里有美陽城者乃後魏徙置之縣非
漢縣也寰宇記作西四十里或字誤無所據

禹貢岐山在西北

山在今鳳翔府岐山縣東北五十里括地志岐山在岐
山縣東北十里說文解字作邽或爲岐薛綜曰山有兩

岐因以名

段氏玉裁曰此謂雍州荆岐既旅道汧及岐
之岐周太王文王因岐山爲邽邑漢書言山

之字作岐言地之字作邽邽字地理志再
見郊祀志一見匈奴傳一見音皆巨支切

中水鄉周太王所邑

太王自邠遷于此皇甫謐曰美陽西北岐城也括地志

故周城一名美陽城在武功縣西北二十五里卽太王

城也段氏玉裁曰中水鄉亦見說文

有高泉宮秦宣太后起也

宮在今扶風縣東北

鄠

在今鳳翔府鄠縣東北十五里後漢書注今鄠縣元和

郡縣志故城在今縣東十五里段氏玉裁曰鄠廣韻集韻皆眉媚二音

成國渠首受渭東北至上林入蒙籠渠

渠在今鄠縣東十里如涪以爲在陳倉非也

右輔都尉治

雍

今鳳翔府城括地志故城在雍縣南七里字應作邕應

邵曰四面積高也段氏玉裁曰雍讀平聲不讀去聲應邵曰四面積高曰雍猶四方有水自

邕成池者曰邕其理一也自邕卽自擁九州中雍州在四山之內古亦讀平聲

秦惠公都之

史記秦本紀德公元年初居雍城大鄭宮詩譜亦云德

公尙書中候觀期注秦本在隴西襄公元孫德公始徙

雍然則作惠公者字誤矣王氏念孫曰古德字作惠與惠字相似而訛師古不云惠

古德字蓋所見本已誤爲惠矣

有五時太昊黃帝以下祠三百三所

郊祀志雍有日月參辰南北斗熒惑太白歲星填星辰

星二十八宿風伯雨師四海九臣十四臣諸布諸嚴諸

逐之屬百有餘廟又云雍舊祠二百三所此作三百恐誤也五時鄜時吳陽上時下時密時北時皆在縣南云吳陽者以在汧山之陽也諸逐封禪書作諸述

橐泉宮孝公起祈年宮惠公起

史記作斬年二宮址在今府城內東南隅括地志宮在岐州城西故城內或曰今東湖即橐泉也

械陽宮昭王起

宮在今扶風縣東北二十里徐廣蘇林音械為域

有鐵官

漆

今邠州地通典括地志並云邠州新平縣漢漆縣後漢

書注故城今邠州新平縣是也

水在縣西

今漆水亦曰新平水出白土原東陳陽原西下流入于涇又有漆水出麟遊縣西漆溪下流合岐水入渭山海經踰次之山漆水出焉北流注于渭水經漆水出杜陽縣俞山東北入于渭說文解字漆水出杜陽岐山攷二漆水實出一原麟遊之東北即邠州之西南耳其水一流入涇一流入渭亦猶駱谷水同出一原一流入渭一流入漢也古字踰俞同俞山即岐山之連麓耳

上當有漆字各本無漆字淺人刪之也此以水名名縣刪之則不可通又曰漆水出今邠州脚公劉西南流至麟遊扶風間脚入渭詩率西水游箋云循漆沮水側是此水原委自幽至邠漢人審知形勢又曰此漆沮在

涇西禹貢道渭又東過漆沮則在涇東與岐周無涉涇東之漆沮則入洛者也松按錢氏蓋用戴氏震之說謂南流入渭縣詩之漆南流入渭者也

有鐵官

元和郡縣志今普潤縣西有小城蓋置鐵官處攷普潤今麟遊縣地麟遊與邠州及乾州之永壽縣相接壤漢漆縣今永壽縣亦有之故基址不甚分明

莽曰漆治

梅邑

在今邠州三水縣東二十五里後漢書注元和郡縣志並云在三水縣東二十五里梅即邠字之通用也正作

穆段氏玉裁曰梅音荀松按梅邑公劉所邑有幽鄉今陝西邠州梅邑漆二縣

有幽鄉詩幽國公劉所都

說文解字邠周太王國在右扶風美陽又云美陽亭即幽也民俗以夜市有幽山此誤也疑後人加之蓋既稱邠為太王國不得又云在美陽矣桓譚新論邠亭周太王厠處其民有會日以相與夜中市不為即有災咎在今三水縣西三十里元和郡縣志邠國城在今邠州理東北三十九里三水縣西三十里段氏玉裁曰謂其地焉公劉之所居也幽鄉亦見郡國志王氏念孫曰都當作邑上文美陽下云禹貢岐山在西北中水鄉周太王所邑即其證景祐本正作邑詩譜正義文選北征賦注引此並作邑松按美陽中水鄉太王所邑自幽遷于此岐山在西北岐山扶風二縣

隄麋

在今鳳翔府汧陽縣東三十里後漢書注故城在今汧陽縣東南太平寰宇記縣東有故城存元和郡縣志縣東八里有隃麋澤郡國志作渝麋闕澤縣道記曰縣因原以為名段氏玉裁曰隃音踰有黃帝子祠莽曰扶亭

陳倉

在今鳳翔府寶雞縣東二十里元和郡縣志故城在寶雞縣東二十里應邵曰縣氏陳山姚睦曰黃帝都陳言在此

有上公明星

說文解字甘氏星經曰太白上公妻曰女媧居南斗食

厲天下祭之曰明星史記始皇本紀三十三年禁不得祠明星

黃帝孫舜妻盲冢祠有羽陽宮秦武王起也

宮在今陳倉故城人或於此得羽陽千歲瓦當也

杜陽

今鳳翔府麟遊縣地郡國縣道記杜陽縣晉省在今鳳翔府北九十里普潤縣界

杜水南入渭

今杜水曰大橫水出麟遊縣西招賢鎮下流合瀆魁鄉谷莫谷諸水合雍水入於渭亦謂之武亭水詩自土沮漆齊詩作自杜土杜通用也段氏玉裁曰杜水南入渭下各本無詩曰自杜四字

惟景祐二年本有之按師古曰人之初生自土漆沮齊詩作自杜言公劉避狄而來居杜與漆沮之地此班引齊詩而顏說之也王伯厚詩地理考胡身之通鑑注所見漢書皆如此小顏謂為齊詩必是襲漢書音義唐初齊詩久亡也近人或云莽曰通杜四字乃詩曰自杜之譌則非矣古土杜同音通用故毛詩桑土韓詩作桑杜是也杜訓塞故莽以為通杜為名不善而曰通杜

莽曰通杜

今掌京畿道監察御史高郵王君念孫以王應麟三家

詩攷胡三省通鑑注校此云莽曰通杜應作詩曰自杜

攷水經注有此文則王胡之證非焉松按王段之說為長錢君據水經注

駁之豈知水經注即沿俗本之誤耶

泝

在今隴州東南五里史記正義隴州泝原縣漢泝縣地

通典漢泝縣在今泝原縣南後漢書注故城在泝原縣

南元和郡縣志縣在泝水之北段氏玉裁曰泝音牽凡云古文以為者古者五

經皆謂之古文此古文即謂禹貢釋禹貢道泝以綴禹貢也不言禹貢泝山在西而云吳山古文以為泝山者今日吳山古曰泝山以今綴古兼載之也謂之古文者漢謂尚書為古文太史公十歲則誦古文亦謂尚書也非必孔壁出者乃為古文矣曰雍州山者釋職方雍州其山鎮曰嶽山以綴周官也一物而兼綴二經也職方曰嶽秦漢曰吳嶽其即吳山不待煩言矣

吳山在西古文以為泝山雍州山

山在今隴州南七十里括地志泝山在泝原縣西六十

里其山東鄰汶岫西接隴岡攷封禪書有吳岳徐廣曰

在泝國語又謂之虞古字虞吳通用也據尚書古文故

云後皆同此閻氏若璩曰岫山在隴州西四十里唐六

州南八十里唐六典關內道
名山曰吳山者是實非一山

北有蒲谷鄉莛中谷雍州莛蒲藪

今州西四十里有蒲谷水下流入泝段氏王裁曰謂今
之蒲谷鄉莛中谷

即雍州莛蒲藪釋職方其
澤藪曰莛蒲以綴周官也

泝水出西北入渭

今水出泝山下流得關山蒲谷水至隴州城南曰魚龍
水其地沙間有石破之皆成魚龍之形頭角鱗骨皆具
乾隆五十四年泝陽縣知縣桂林劉君良憲以石詒余
見者皆詫為奇觀而不知其所由來也又合白龍泉入
渡暉川大小石門澗水至邸店入于渭水經注渭水東
與楚水合世所謂之長蛇水出泝縣之數歷山南流注

干渭闕駟以為泝水也攷今長蛇水出泝山南禁隄吳

山廢縣境因其亦出泝山故闕駟誤指之非也段氏王
裁曰西

北句絕此水自
西北而東南也

芮水出西北東入涇詩芮隄雍州川也

今水出平涼府華亭縣西隴山之東禁東北流逕崇信
縣西北境與別原會別原出涇州靈臺縣五馬山曰達
奚川水別原既會芮水下流逕涇州合揜水蒲川水三
交水至邠州長武縣曰宜祿川水逕停口鎮東入涇亦
名之曰黑水也芮字又作洎詩公劉芮鞠之即即芮隄
也爾雅屋內為隈外為隩隩義亦與隄同芮汲冢書又
作納段氏王裁曰師古曰公劉詩芮鞠之即韓詩作芮
隄按爾雅屋內為隩外為鞠鞠字林作坻鞠隄坻

三皆九六反阨從自尻聲尻從尸九聲九之入聲得九
六反俗本譌阨則不可通云雍州川也者此蒙上交芮
水出西北東入涇謂涇芮皆即職方之雍州其
川涇芮以綴周官也芮今周禮作洎如銳反

好時

在今乾州東北七里通典元和郡縣志並云故城在好
時縣東南十三里太平寰宇記作四十三里長安志漢
好時故城在奉天縣東北七里郊祀志雍東有好時故
縣得名

塢山在東

山在今乾州東北長安志山在好時縣東段氏玉裁曰塢音邱毀反

有梁山宮秦始皇起

山在今乾州北十里張敞曰梁山在岐山之東九變山

之西段氏玉裁曰按始皇三十五年幸梁山宮從山上見丞相車騎衆弗善也即此梁山宮閻氏若璩曰

此即太王自邠抵岐踰梁山之梁山也松按梁山在好時縣地皆在右扶風

莽曰好邑

號

在今寶雞縣東六十里今日號川鎮九域志故城在鳳
翔府南三十五里太康地記曰號叔之國也史記秦本

紀謂之小號

有黃帝子周文武祠號宮秦宣太后起也

段氏玉裁曰謂黃帝子周文王武王皆有祠也

安陵惠帝置

在今咸陽縣東北三十五里括地志元和郡縣志並云

故城在咸陽縣東二十一里惠帝陵也皇覽安陵山高
三十二丈廣袤百二十步居地六十頃三輔黃圖去長
陵十里關中記徙關東倡優樂人五千戶以爲陵邑善
啁戲故俗呼女啁陵

莽曰嘉平

茂陵武帝置

在今興平縣東北十七里元和郡縣志長安志並云故
城在興平縣東北十七里武帝陵也應邵曰本槐里之
茂鄉三輔黃圖陵周回三里高十四丈一百步關中記
高十四丈方百四十步建元二年置松按茂陵令
見原涉傳
戶六萬一千八十七口二十七萬七千二百七十七

莽曰宣城

平陵昭帝置

在今咸陽縣西北十三里後漢書注故城在咸陽縣西
北元和郡縣志在西北二十里郡國記昭帝平陵故城
與茂陵故城相去二里三輔黃圖陵去茂陵十里東西
三丈五步

莽曰廣利

武功

今鄜縣元和郡縣志武功在渭水南今鄜縣是太平寰
宇記故城在鄜縣東四十里褚先生曰武功扶風西界
小邑

太壹山古文以爲終南

今亦曰太白山在鄠縣東南四十里水經注武功太白
去天三百卽此山也終南毛詩傳云中南淮南子作終
隆古字終中通用南隆聲相轉攷山在今鄠縣南者曰
終南在今西安府城南者古只稱南山從未以終南
之名後人不知乃以陝西省迤南一帶山並曰終南而
別太白爲終南之一峯其說始自唐柳宗元一輩人其
不遵奉班氏之旨舛譌甚矣段氏玉裁曰兩言古文以爲者釋道山終南敦物之
文以綴禹貢亦今古異名同實也今日大壹古曰終南
今日垂山古曰敦物閻氏若璩曰張衡西京賦終南太
一隆岷崔峯潘岳西征賦九峻截薛太一龍從面終南
而背雲陽跨平原而連蟠冢則終南太一非一山明矣

岳山古文以爲敦物

今日武功山在鄠縣東南俗呼之爲鑿山鑿岳字聲相

近故也舊本作垂山垂山之名不顯于古人書封禪書

郊祀志並稱岳山徐廣曰武功有太壹山又有岳山是

作岳山爲當耳岳與垂字形相近誤之今改正松按段氏仍作

垂山且駁錢氏之說曰沂之吳山周禮作嶽山嶽岳一
字不當武功之東又有岳山也各本垂山不容有誤垂
字篆作垂古文作垂形近
物豈古名敦物之故與

皆在縣東斜水出衙領山北至鄠入渭

今山在鄠縣西南二十里斜水出斜谷逕五丈原東合

青峯澗朱石澗水入渭

褒水亦出衙領南至南鄭入沔

今水出褒谷逕武關驛合野羊河武林河馬道河沙河

逕褒城縣東至龍江浦入漢俗稱之曰黑龍江也二水
即褒斜道水西京賦注曰南口褒北口斜長百七十里

松按南至南鄭上南字錢氏據王校增王氏念孫曰今

有岳山斜水雍水祠三所莽曰新光

新輯注地里志卷第二終

